



VÖG VOLAPÜKA.

,Daniil Morozov': redakan
ä vicifal,
,shido2308@yahoo.com',
,Ekaterinburg', ,Rossija' / Rusän.

Jäfidot soga bevünetik Volapükka.

YELOD 34^{id}. NÜM: 5. 2024 MAYUL. PADS: 37 jü 44.

O Volapükflens valöpo!

Sekü säks de reidan ömik esludob ad notükön su pad lätik nüma at notedis yönädik, kels jonons, das köls kil Volapükka suvo pägebons ün tumyel degzülid. Ya ün novul yela: 1885 < el J. M. Schleyer änunom in Volapükabaled okik, das Volapük labon kölis kil oka, „sevabo violäti, goldaköli e grüni, bi Vp eprimon so mükiko, äs viol; neodon ad benoplöp goldi mödik; e spelon (diseinön) ad ai blinön dabeni gretikün menefe“ (binos nitedik, das sperantamuf gebon köli sümbolik bal etas; el Zamenhof äsevom-li bosi dö köls Volapükka?). Ün yunul yela: 1886 < Volapükabür in ‚Konstanz‘ äprimon ad selön ta-nodis ko köls et asä propagidamedis Volapükka. Tanods kilkölik pägebons pö kobikams veütik. Ön jenet lezála limans Volapük-kakluba di ‚Peterburg‘ ägebons kölis ot fomü flors mekavik (violät pälogen su florabledem, grün su kaul) ko tanod yelovik ü goldakölik. Vönaoloveikod at änepubon primü tumyel tel-degid nelabü lezälizels e kongreds Volapükanas. Nu pos rop lunüpik köls valik kil et palogons su tiädamagod gaseda obsik. No reafonsös dönu in glömäd! Pogebonsös — ön jenets zesüda — i su tanods u stäns kilköliks!

Suköl särvigastofädi florüpik kilkölik
redakan:

Küpäl demü pats.

Fa „Frank Roger”, tiäd rigik: „An Eye for Detail”. Ini Volapük petraduton fa „Hermann Philippss”. El * malon vödis anik, kels papiänons dono.

Jiel Alice älogof ini lok ed ävestigof lokamamagodi* oka. „Bos jinon neverätön”, ätikof, „ab kis-li üfo?” Pos zog bosik änokof len glät. Lokama=magod ofa älölogen jekiko. Of it ädunof-li atosi? Ämö=gos-li, das lokama=magod äjonon-la bosi, kel ädiston de dun lönik ofa? Äkanoy ye te sevön, vio älogodoy, if älogoy ini lok. Ab lio äkanoy-li üfo labön fümi, das lok ägevon magodi veratik? E lio äkanoy-li sevön, das lokamamagod oya änepubonöv, if no plu ästa=noy fo lok?

Älemufükof kapi, e lokamamagod ofik ädunon leigo. Too ädotof. Loks äbinons dins vemo trätiks. Neföro ikonfidof lölíko onis. Lio äkanoy-li fümön, va äjäfidons verätiko? Ba äkanoy vestigön atosi. Äzisukülof in saked ofa ed ätuvoft dini ut, keli isukof.

Medü lipastib* ädäsinof sirki sui cüg nedetik. Lokamamagod ofik ädäsinon sirki sui cüg detik – jünu äbinos verätik. If nu ödäsinoföv killieni sui cüg nedetik lokamamagoda okik, killien leigik öpubonöv-li su cüg lönik detik ofa? E lio ökanoföv-li vestigön atosi ön mod votik, kas logön ini lok? Loks ga sio mödo no äbinons konfidoviks.

If ölogoföv-li ini lok votik? Ab dub atos övedükoföv dinädi at fikulikumi nen zesüd. Lio ökanoföv-li fümön, das loks votik öbi=nonsöv konfidovikums ka lok ut, fo kel ebo nu ästanof?

Id ökanoföv säkön votane utosi, keli älogons in logod ofa. Ab if pösod somik ögevonöv-li nünis neveratik, desino u nendesino? Mens mödikün ga no älabons küpäli demü pats.

Pas äzogof, tän ädäsinof killieni sui cüg nedetik lokamamagoda. Du däsinam ämufof boso kapi, e dub atos i lokamamagod oka ämu=fon, dub kelos tipot lipastiba äkontagon logi nedetik ofa in lok.

* **lipastib** – lipstick, Lippenstift;

lokamamagod – mirror image, Spiegelbild.

Pluna älogenutülof*, äsва bos ireafon-la ini log ofik. Äbinos-li sek mufa nendesinik ofa? Nemögö!

Ävestigof staböfikumo lokamamagodi oka, bos ätrübükon ye logami ofik. Ekö! kis ijenon-li tefü log detik ofa – nedetiko in lok? Älogoton boso sveliko e vemo dofareda=köliko, äsва ek iflapon-la me pun ta log ofika lokamamagoda. Va kod atosa äbinon-li lipastib ofa? On ye ga no idranon lü log lönik ofa, vo-li? Jenöfo bos no äbaabinet, äsä ya iniludof. Dönu pluna älogenutülof. Süpo äsenof, vio dol äsüükon in log nedetik ofa. Ädoatof prüdiko oni ed äkonstatof, das log jenöfo äbinon mu senöfik. Äsumädof-li üfo lokamamagodi oka? Atos ga sio äbinon nesiäm voik!

Log ofa äprimon ad dolön vemo, e ledredäl äbemekädon ofi. Ätikof: „Lienetikos at muton finikön. No sevob, kis ejenon is, ab nu saidos.”

Log dolik ofa äfärmon. Täno äflapof levemo ta lok.

Äluvokädof sekü dol, ven pun ofa äjokon ta glätot. Lok ädäbrekon e jebs ädofalons zi. Me log bal älogof lü nam okik, kel levemo äbludon ed ädolon. Täno äsenof, vio logod ofa päderfon dub bos düfik, ed i log votik nog jäfidöl päfääpedon*.

Val äblägikon, e tikod lätk ofa äbinon: „Jenöfo bos löliko no äbabinet, tefü lok at. Binos gudik, das edäbreikob oni.” ■

* **loganutülon** – to blink (with eyes), blinzeln;

fäipedön – to squeeze shut, zudrücken.

SMILOBSÖS TELNA!

Tifel (tradutod fa „I. Kholin’).

Tifel äkommom vöno neito dub litam in cemi sembala mena pöfik ed äsükom al tifön bosi. Men pöfik, kel no äslipom, äsagom, takediko ome: O flen obik! Kömol neito al sükkön bosi is, kö sägo delo no kanob tuvön nosi.



Tifan.

Tifan äkommom seimna neito yufü litükam ini cem ömika mena pöfik ed äsukom bosi ad tifön. Men pöfik, kel no äslipon, äsagon takediko ome: „O flen obik! Kömol neito ad sukön bosi is, kö igo pö delalit kanob tuvön nosi.”



HIEL BOLEŠ.

Finod koneda fa ,Maksim Gor'kij'.

„Dälö! kime-li?”

„Lesio elile Boleš!”

„Ab jenöfo no dabinom-li?”

„Ag! o Yesus sa ,Maria’! E lio veütos-li, das no dabinom? lio-li? No dabinom, ab äsif dabinomöv-la!... Penob ome, e so jenos, äsif dabinomöv-la... E tefü ,Teresa’: jiat binob ob, ed äsif gepenom-la obe, ed ob dönü ome...”

Ereafob ad suemön... Ereafob ad stad so dolöfik, so legagik, so jemik demü bos. Nilü ob, ön fagot stepas kil de ob men ut lifon, kel in taled lölük labon neki, kel kanon-la träitön oni ko lelöf, ladöfo, e men at me fomälam datikon pro ok fleni!

„Kluö! epenol pro ob penedi elile Boleš, ed obo ebegob votikane ad reidön ati, e ven reidoy pro ob, lilob e cedob, das elil Boleš vo dabinom! E täno begob ad penön penedi de ,Boleš’ lü ,Teresa’... lü ob. Ven pro ob epenoy penedi somik e reidoy, lölöfiko süadob, das elil Boleš dabinom-la. E sekü atos fasilikumos pö ob ad lifön...”

...Kios!... Diabö!... Benö! sis ettim eprimob nomöfiko telna a vig ad penön penedis lü ,Boleš’ e gespiki de ,Boleš’ lü ,Teresa’. Legudiko älautob gespikis at... Suvikna so äjenos, das älilof loreidi onas ed äledrenof... me folidvög vemöfik äledrenof. E demü utos, das äsükob pö of medü pened lü of de hiel Boleš magälöfik drenami, nenmesedo änätükof pro ob hogis valik pö lustogs, jits e ret... Latikumo mö muls zao kils pos jenotem at pifanäböpof demü bos. E nu ba binof deadik.”

...Sevädan obik ämobladom zenapuini se zigarül, medito älogedom lü sil ed äfinükom koni:

„Kios!... Plü men ebelifon dinis biedälüköl, plü desiron vemikumo plitikosi... Ab no suemobs osi, du pajelobs me tugs yönädik obas äsvo me klots e logobs odis ön stad vali miüköl lupleida e süada tefü nensin valasotik obas.

Sek binon saidiko nensiämik... e vemo nemiserik. So sagoy: mens sinöl-la... Ab kins binälo binons-li mens sinik? Bu valikos binons mens: bomem ot, blud ot, mid ot e nevs ot, äsä pö obs. Dü tumyels lölük

spikoy obes atosi ün del alik. Obs ga lilobs e... diabö! kio tatikälik atos valik binon! Jenöfo i ga binobs siniks e bo go dibäto siniks... ma stad gufurasmik sotülas valasotik fatüita e süada tefü pluam nevas e breinas obsikas tefü breins e nevs menas ut, kels teiko binons läs käfiks ka obs, badikumo skilons ad jonön simulo okis gudikanis, kas jonobs simulo obis... Too saidosös ad spikön dö atos. Atos valik binon so sevädisk sis lunüp... das igo binosöv jemik ad sagön..."

1896.

NOET TRADUTANA. Nems Polänik pepenons ma lotograf Polänapüka, do lautan ägebom penuli me lafab Rusänapüka. Zif: ‚Święciany’ < nu sevädon ön nem lietuvik: ‚Švenčionys’. El ‚Boles’’, äsä klülos ma koned it, binon löfulanem tefü fom rigik: ‚Bolesław’. Zuo vöd: ‚boleš’ (u ma sotül pronik sevädiskum, kel pemänioton in koned at: ‚boles’t’) in dialegs Rusänapüka kanon sinifön malädi. Ba atos binon te kobojen fädik, ab lautan id äkanom-la lüjonilon ad stad malädülik jipösoda magälöfik. Zuo ladyek spika pöpik ko stamäd ot („boleznyj”) labon sinifis: „digik”, „löfik”. Spik ela Teresa labon patis Polänapükik ömik, samo lüspikoti: ‚panie’ (= o söl! o hisiör!). Reidans Rusänapükik küponsöv modi fuginänapükik notodama pö lüspik (näi subsat: ‚panie’): in Rusän no kösömoy ad nemön meni ma cal u dinit. Ye binos dotabik, das igo in Polän stukot somik lüspika binon-la mögik tefü studan (tapladü notodots suvöfik: ‚pan profesor’ [söl: profäsoran], ‚pan doktor’ [söl: sanan]). Zuo jiel Teresa gebof notodamodi no=Rusänapükik e ba no=Volapükiki, mäniötölo anna lüspikäbi medü värbafoms pösoda kilid. Desino ekipedob patöfì bisarik at spika ofik. ■

KONOTÜL.




Nimikan lupik („Werwolf“): ‚Petr’, viovemo ästeiform, no äplöpom ad dagetön karieri stelavik. Logölo lü mun medü daleskop, ai bosilo ärorom. Patöf at äfavükon jäfüda= kompenanis e vemo ävutükon cifevi omik. Pö jenet somik karier kinik ämögon-la! Zuo el Petr äfidom menis.

DOG ELAS ,BASKERVILLES'.

Fa hiel ,Arthur Conan Doyle'. Petradutöl fa hiel ,Oleg Temerov'.

Tradutod papübon bai koräkots pülik fa hiel ,Daniil Morozov'.

KAPIT VELID. ELS ,STAPLETONS' DI ,MERRIPIT HOUSE' (5).



„ATOS BINON DREAMÖP SEVÄDIK:
,GRIMPEN’.”

Bos braunik ärölon oki ed ämufedon in jugs grünik. Poso särvig lunik demü dol ädremilöl pitenükön löpio, e vokäd lejeikik ispearükon leogi love maräd. Atos iflodöfükön obi dub ledred, ab nevs kompenana obik äjinons nämöfikums, ka uts obik.

„Emoikon!” äsagom. „Mar emosumon oni. Nims tel ünudels tel, e ba mödo mödikumo, ibä kösömkiks ad tävön usio pö stom sigik, e neai suemons disti, jüs mar ogleipon onis. Dreamöp sevädi at: ,Grimpen’< binon top badik.”

,Stapleton’ äsmilom. „Atos binon dreamöp sevädi: ,Grimpen’,” äsagom. „Step pölik pö top et malon deadi pro men u nim. Ebo ädelo eloegob goulön jevodili bal topikas lü on. No efägon ad gekömön. Eloegob lötirön oni kapi okik saidiko lunüpiko se marädaläned, ab fino enütiron oni. Igo pö säsuns sigik nesebos ad lovegolön love on, ab pos fluküp reinöfik at top usik binon vemo riskädi. Ab ga kanob tuvön vegi lönik ebo lü zän ona e gekömön lifiko. Nämätü saludan: ,George’, ekö! jevodil neläbik nog bal!”

„Ab esagol, das kanol-li dudranön ini on?”

„Si! usio vegils ömik dabinons, kelis men skilik kanon begolön. Etüvob onis.”

„Ab kikodo vilol-li tävön ini top so jeikik?”

„Soö! logol-li lubelis etflano? Binons nisuls voik peditüköl valaflano fa mar nebegolovik, kel züon onis ya dü yels mödik. Us planis e pabis seledikis kanoy getön, üf sevoy, vio rivön onis.”

„Osötob steifön ad xamön benofäti obik seimüpo.”

Ästunolülogom obi. „Godo sädesinolöd tikamagoti somik!” äsagom. „Odöboböv demü deadam olik. Lesiob ole, das mö god nonik pülikün geköma ola ön stad lifik odabinonöv. Atos mögon te dub memäl tefü mäks topädik komplitik semik, kelosi sevob.”

„He!” ävokädob. „Kis atos binon-li?”

Hag lunik nelaodik ä nebepenamoviko lügik ispearikon love mar. Äfulükön luti lölik, ab ga änemögos ad fümükön, kitopao ätonon. De mur dumik icenon ad ror donöfik, e täno ige-cenon dönu ad mur glumidik pebö. ,Stapleton’ älogedom obi ko notodot bisarik su logod okik.

„Kio nekösömic top at binon: maräd!” äsagom.

„Ab kis üfo atos binon-li?”

„Feilans lesagons, das Dog elas ,Baskervilles’ somo lävokon lefanäbi okik. Ya älilob atosi ömna büikumo, ab neai sovemo laodiko.”

Ilovelogob, labölo jeiki pö ladäl, kamaläni gianik geilikumöl fagio, stenöfiki dub diledils grünik jugas. Nos ämufon ad givön mali lifa pö spad veitik plä pär rabas, kels ägratons laodiko de klifatipot pödü obs.

„Binol kulivan. No kredol nesiämi somik, vo-li?” äsagob.

„Kise kodidol-li toni so bisarik?”

„Mars jafädons noidis bisarik semikna. U binos sad släma, u löpikam vata, u bos somik.”

„Nö! nö! at äbinon vög lifota.”

„Soö! ba so äbinos. Älielol-li föro vokädön boturi?”

„Nö! neai.”

Fövot ponotükön.

NOTED YELA: 1887.

,KUBICS RUDOLF'

in ,München', tö ,Rindermarkt 12/II',

komandom Vpanes valik **Vpa=mäkotis** lejönik gütiko pemekölis, kels suämoms

a) pro söls as blötanad:

a samäd bal makis 1,60

ä) pro läds as peänadek särvigik:

a samäd bal makis 2,50

} keninükamü tanod
ko köls Vpik kil.

Mäkots at jenöfükons diseini plagik ad pagebön noe aldeliko abi pötü zäls. Pö jenet lätik palenlabons su tanod Vpik len blötaflan nedetik.

Mäkots at kanons pagebön as med dientifükama odas e fa klubs topik e fa Vpans balatik tala ed ejäfidons balidnaedo as sevädovamals somik pötü kongred bevünetik telid Vpanas in ,München' tü 1887 gustul 6—9.

Mäkots at papreparons tö sevädik febodastitod lekanik söla:

,Aufleger Otto' in ,München'.

Dalaban päta gitöfik tefü fom e selan leteik binom **,Kubics Rud.'** tö ,München', ,Rindermarkt 12/II'.

(Ma „Cogabled“.)



NOET REDAKA. Sevobs saidikosi dö Volapükaköls kil, ab kis äbinon-li blötanad Volapükik? Ba äsümons boso ad manidek ut, kel palogen len gun datuvala su magods anik.

Demals volapükik.

Blötanads plo söls, a samad maks 1 · 60	} ninkikü tan
» » läds, » » 2 · 50	} kilklik

Demals at pepoloms pötü kongef in München. Label fomajela gitik e selel lebalik: Kubies Rudolf in München, Rindermarkt 12.

Noted sumik se Volapükagased fa ,Obhlidal'.